

APITETANAINTSIRI JOSANKINATZINIRI PABLO CORINTO-SATZIITE

Ovethataantsi

1 ¹Naakara Pablo osankinatzimiroi iroka, Irotyaantajanore Jesucristo nonatzi, irootake ikovakaakenari Pava. Arira nokaratziri iyeki Timoteo nosankinatzimiro. Eerokayetakera nosankinatzini pikaratzi papatoventaari Pava janta nampitsiki Corinto, irijatzira nosankinayetziniri ikaratzi itasorentsitakaitairi janta kipatsiki Acaya. ²Onkaminta ineshinonkayetaimi Ashitairi Pava, kameetha isaikakaayetaimi, ari inkempiutzityamiri eejatzi Avinkatharite Jesucristo.

Ikemaantsiyetakari Pablo

³Thame antharomentaiyaari Pava, jirintari Avinkatharite Jesucristo. Iriitakera Ashitairi, neshinonkataneri. Iriitake Pava, poshenkantaneri inatzi. ⁴Aririka ontzime pomerentsitzimovaitaineri, iriira Pava poshenkaineri, iroora amatantyaarori aaka amposhenkayetyaari pashinepayeeni opomerentsitzimoyetari. Irojatzira amateri aakaite okaratzi jantzimotakairi Pava. ⁵Irojatzira matachaneri, aririka añaayetero ankemaantsiperotziivaitya ikempitapaintzirora Cristo, arira añaityakyaaro eejatzi imposhenkaperotzitayeeetai. ⁶Aritakera okantakari, irootakera nokemaantsivaitantakari naaka, iro niyotantyaarori tsika nonkantya nomposhenkayetyaami

eerokaite, ari onkantya pavisakoshireye-tantaiyaari. Irootakera iposhenkantayee-takanari eejatzi naaka, ari onkantya niyotantyaarori tsika nonkantero nomposhenkayetaiyaami eerokaite aririka piñaayetairo okaratzi nokemaantsvaitakari naaka. ⁷Iroora niyotajaant-takari aritake imposhenkayeetaiyaami eerokaite ikempitayetakenara naaka, aririka pimatanairo pinkemaantsvaitya nokempitaakerora naaka.

⁸Iyekiite, nokovi piyotaiyero okaratzi noñaakeri naaka pomerentsitzimoyetakanari nosaikantapaintari Asia-ki. Osheki jovatsinaavaitaitakena noñaajaantake ari nonkamakemi. ⁹Nokinkishiretakotaro iroñaaka, iroora ishinetantakanarori Pava noñaakero nokamimavetaka, onkantya niyotajaantantyaari naventaashiretaiyaari Pava, te arimatsite naventaaatziitashivai-tya naaka. ¹⁰Iro kantacha Pava jimatakero jovavisaakotaana nonkamemi, eekero iriyaatakatyeero. Aventaashire novakeri eekerora inkempoyaaventatyeena apaata. ¹¹Eejatzira pinkempiyetanaiyaari eerokaite pinkarataina naaka, piñaaña-tairi Pava inkempoyaaventantyanari. Ari onkantya impaasoonketziyyetantaiyaariri Pava inkarate kemakoyetainaneri jimatakero Pava ikempoyaaventana.

Opoñaantari Pablo irareetya Corinto-satzi

¹²Niyotzira naaka notampatzikatzimo-tantake tsikarika nosaikimoyetantake.

Iriira Pava iyotatsi tekatsi namatavite, tekatsi ompaitya nompashiventakovai-tyaari. Tsikara nokantaka niyotaayetakemi eero kaite, te noñaaventapainterokempi takaantavetari osavisatzi iyotane-taantsi onatz, aña intaani noñaaventapiintakero tsika ikanta Pava ikamintaanthantz.

¹³Tema okaratz nosankinayetakemiri tekatsira nomanapithatem, onkarate pomerentsivaitachaneri inkemathayeetero. Okaminta pinkemathatapiintairo okaratz nosankinayetzimiri. ¹⁴Kempitaka aritake pikemathayetakena kapicheeni, kantake pinkimoshireventaina apaata impiyerika Avinkatharite Jesús. Ari nonkempitz-tyaari eejatz naaka, kimoshire nonkanta-ventaiyaami eero kaite apaata.

¹⁵Irootakera nominthatantakarori napiitairo nonkivantem janta, onkantya pinkimoshiretziitantaari nareetaiyamira.

¹⁶Ari nokovavetakari nonkivantana-ke-mimi niyaatantyaarimi Macedonia-ki, impoña napitanairomi eejatz nompiyeerikami. Ari onkantyaami pampitakotanta-vaiyanarimi potyaantaina Judea-ki. ¹⁷Iro kantacha noipithokakero nokinkishirevetakari nanterimi. ¹⁸Piñaaajaantakema eero kaite osheki namatavitapiintakemi? ¹⁹Pikinkishiretama noñaavaitashivaitaka nonintakaaneki, nokantapiintake “iAri! Nonkivantakemi?” ²⁰Piñaaajaantzima niyotataavetakaro eerora nomatziro nonkivantem? ¹⁸Tema Pava kaari thaiyanetacha, jiyotzi irirori te nothaiyavaita naaka nokantzira “iAri!” ¹⁹Ari ikempitzitari eejatz Itomi, Jesucristo, tsika itzimi netapaakari noñaaventakotapaakemiri notsipatantakariri Silvano ipoña Timoteo. Tema Jesucristo te inkantanete irirori “iAri!” iriyotakerika eero jantziro ompaityaarika. Tema okaratz jantapiintakeri Jesucristo okempivaitakaro irimi Pava kantapiintaintsine “iAri!” ²⁰Iriira Jesucristo iyotakaajaanta-yetairi ari omonkaratai okaratz

ishinetantakeri Pava. Irootakera ankantan-tayetaiyaari aakaite aventaashireyetaarira “iArivé!” Irootakera iriñaapinkathayeetan-taiyaariri Pava. ²¹Okempivaitakarora iri Pava ovithaakaayetakairi Cristo, irijatzi saipatzitoyetaineri, ²²okempivaitakaro impothoyetatyem jashiyetaira. Tema aiiirora jotaantakairi Tasorentsinkantsi inampishirentai, ari ayotziri omapero Pava irothoyeero okaratz ishinetakairi.

²³Omoperotatyara, jiyotzi Pava te namatavitemi nokantzimira iroñaaka: Kantakaantzirori kaari nokivantantami Corinto-ki, ari onkantya eero nokisavai-tantapaakami. ²⁴Tera nonkantaty naakara omperatamiri onkantya pinkem-pisantayetantyaanari. Tema oisokero pikantaventanakaro okaratz pikempisan-tanairi. Iro kantacha kantatsira nonkami-naayetaimi pantayetantaiyaorori oimoshi-renkayetaimineri.

2 ¹Jirokara nokinkishiretakari: Eerora napiitairo nonkivantaimi, iroorika ovashiretakaavaityaamine nokvantzimi. ²Aririkami novashiretakaavaityaami janta, ³niinkama tharomentashiretakai-yaanane naaka? ³Irootakera notyaantantakamiri pairani nosankinare, te nonkove niyaatashitemi onkantya povashireta-kaantavaityaanari. Aña eerokavetaiya-kantharomentashiretakainane. Irootake nokantashirevetantakari: “Eerora niyaatzita, nonkemakotavairiita tzimatis-rika tharomentashiretakaiyaanane. Ari onkantya nonkimoshiretakaantavaityaa-riri eejatz irirori.” ⁴Notyaantakemiro-ranki nosankinare, novashirevaitatyara nosankinatakemiro. Tera iro notyaantantakamirori onkantya nonkantzimoneenta-kaantyamiri. Aña nokovavetaty piyote osheki netakoperotatakami.

Ipeyakotziri Pablo kantzimoneentakaaneri

⁵Nokovi iroñaaka noñaaventeri irinta shirampari ovashiretakaavaityakanari.

Tera naaka inkantzimoneentakaavaitakya, aña kempitaka maaroni eerokaite ikantzimoneentakaayetakami. (Nokantarori “kempitaka,” tema te nonkove novanaatziivaitero.)⁶ Tema tzimatsi osheki pikarataiyakeni eerokaite, aritake povasankitaavaitakeri. Iro kantacha iroñaaka aritapaaake povasankitaakeri. ⁷Pimpeyakotairi iroñaaka, pimposhenkaiyaari, ayimavaitzirkari irovashirenka. ⁸Nokovakotaiyimi pinkantairi irika shirampari: “Netakotaami.” ⁹Pairani, nosankinatakemiranki nokantakemi: “Povasankitayeri.” Noñaantzityaamira noñaantyayamiri omaperorika pikempisantana. ¹⁰Iro kantacha iroñaaka ikovi Cristo pimpeyakotairi irika shirampari. Irootakera nantairi naaka tema irootake kameethatzimotaimineri maarointen eeroka. Itzimirika pimpeyakoyetairi iroñaaka eerokaite, aritake nompeyakontai eejatzi naaka. ¹¹Irootakera antayetairi onkantya eero ikitsrirkantai Satanás. Tema ayotaiyironi okaratz ikoviri iranteri irirori Satanás.

Kantzimoshirevaitakariri Pablo Troas-ki

¹²Chapinkipaite, areetakana naaka nampitsiki Troas niyatantakari nokinkithatakanziro Kameethari Ñaantsi tsika ikantakota Cristo. Arira noñaataikero nokempisantakaantataike ikantakaantakerora Avinkatharite. ¹³Iro kantacha te onimotajaantena janta, tema te noñaapaakeri iyeki Tito. Irootakera navisantanakari jaká Macedonia-ki.

Iriira Cristo oitsinampaakaantaneri

¹⁴Iro kantacha, onkantavetya tsikarika ankenayete, kantatsi ampaasoonketairi Pava. Tema okempivaitakaro oyaampoiri-taatyeerimi Cristo, ipiyaara irirori nampitsiki joitsinampaantakera jovayirita. Oshiyakoyetatyaro eejatzi oivarinakata kasankari maaroni

nampitsiki. Arira ankantayetyaari aaka aatayete tsikarikapayeeni ankamantayetairi atziri tsika ikantakota Cristo.

¹⁵Akempivaitakaro kasankari itayiri Cristo irinimotakaantyaariri Pava. Iroka kasankainkari kantatsi inkemainkayetairo inkarate avisakoshireyetaatsine, eejatzi inkarate peyashivaitaachane. ¹⁶Tema tzimayetatsira, okempitzimovaitari iroka kasankainkari ovamaantanero onatz. Iriima pashinepayeeni okempitzimovaitari kasankainkari iro ovañaashiretairine. ¿Niinkama aritataitatsiri iroshiyakaaventyeetairi iroka kasankainkari? ¹⁷Kaarira irikaite kinkithatashivaitarori ifaane Pava ikovi iraantashivaityaaro kireeki. Aña iriiyetataikera irika maperotanairori ikinkitharyaantzitzi. Irootakera nomata-nairi naaka eejatzi. Iri Pava otyaantake-nari nonkinkithatakaante, nantavaitaineri Cristo, iriira Pava pampoyaanari nantayetzirora.

Antavaiventzirori ovakerari antzimotavakaantsi

3 ¹¿Pikinkishiretama nasagaaventavai-taty naaka? ¿Noshiyakotatyarima amayetzimirori irosankinare, ikantzi: “Paakameethatavakena?” ¿Noshiyakota-tyarima kovirori posankinateneri iroka osankinarentsi, iraayetzimaityaaro tsika ikenayetzi? ²Aña eerokaite kempivaita-jaantakarori osankinarentsi jaakameetha-tantaitari, iroora josankinashireyentai-takanari naaka. Tema aririka iriñaaye-taimi atziriite tsika pikantayetanaa iroñaaka, arira iriyotayetairo okaratz nantzimotayetakemiri, okempivaitana-karo iriñaanayetatyeyeromi okaratz ijosankinatakoyeetakenari. ³Arira añiiori eerokatake oshiyavaitakarori osankinarentsi josankinatajaantakeri Cristo. Iro kantacha tera noñaaventatyereo osankinarentsi koñaatatsiri, kempitarori aririka irosankinayeetero mapikota, aña

noñaaventatziro ipashineshiretakaayetaimira Itasorenka Pava Kañaaneri.

⁴Noñaaventantarori iroka, tema iriira Cristo kantakaakarori aventaashireyetantaariri Pava. ⁵Tera aaka aavyaashityaarone apaniro, aña iri Pava matakayetairori. ⁶Iritakerera Pava matakakenarori noñaaventairo ovakerari antzimotava-kaantsi. Iroka ovakerari antzimotava-kaantsi karimacheenira osankinarentsi kempityaarone paisatori antzimotava-kaantsi kaamanetakaantatsiri. Aña iriira kantakotachari Tasorentsinkantsi añaashiretakaantatsiri.

⁷Pairani josankinatantaitakarori Ikantakaantaitane mapikotaki, okoñaata-paintzi irovaneenkaro Pava, ipoña opeyanaka. Ikanta iñaakerora Moisés-ni, shipakiryaaporo ikantanaka, te onkantaa-jate iramenavorotairi Israel-mirinkaite. Iro kantamaitachari iroka Osankinarentsi osheki okaamanetakaantake, okantave-taka otzimimotziro ovaneenkaro. ⁸Irooma okaratzijimayetairi Tasorentsinkantsi iroñaaka, iroora ovaneenkaperotataitachari. ⁹Tema ovaneenka okantavetaka okaratziovasankitaakaantantsiri, iroora maperokitataiterone ovaneenkatyatampatzikashiretakaantatsiri. ¹⁰Iroka ovaneenkaperotaachari iroñaaka anaatzii-tataitzirora tzimavetachari pairani ovaneenkaro. ¹¹Aritakerera karatataipaake ovaneenkavetapainchari. Irooma ovaneenkaperotaachaneri iroora kantitaachaneri iroñaaka.

¹²Tema tzimataikera iroñaaka minthashiretakagaiyanari, tontashirera nonkan-tanaiya nonkinkithatakaantai. ¹³Te nonkempitavetyaari Moisés-ni ipashikavorotaka eero iñaantari Israel-mirinkaite opeyara ishipakiryaavorovetaka. ¹⁴Tema kisoshire inaiyakeni pairani Israel-mirinkaite, irojazzi ikantayetari iroñaaka ikaratz icharineyetaari. Tema aririka inkemero iriñaanayeetero

paisatori antzimotavakaantsi, eerora ikemathatziro kempivaitaka impashikai-tatyeerimeri ikinkishiretane, intaanira Cristo matairone inkemathatatakaayetairi kempivaitaka impashikaryaakotaatyee-romi ikinkishiretane. ¹⁵Eeniropaitetatsi iroñaaka, aririka inkemero iriñaanayeetero Ikantakaantane Moisés-ni, pashikashire ikantayetaka. ¹⁶Irooma intzimerika piyashiretashitairine Avinkatharite, aritake impashiryaaakoshiretiaya. ¹⁷Ikantakoyeetziri jak “Avinkatharite” irijatzira Tasorentsinkantsi, itzimi saikashivaitakaantaachari. ¹⁸Irooma aakaite aventaashiretaarira Cristo, oshiyayetanaarira Avinkatharite. Tema okempitavitaaro iroñaaka amenaatyee-romi Avinkatharite joorentamatsitakara ashirotaki. Tema amenavorotakoyeetzirira ashirotaki iroñaaka, tera akempitari Moisés-ni ipashikavorovaitaka pairani irirori. Irooma apaata aririka añaaperota-jaantairo irovaneenkaro, aripaitera ankempitagaiyari irirori. Iriitakerera matakairone irika Avinkatharite, Tasorentsinkantsi.

4 ¹Iriira Pava neshinonkataanari okanta nantavaitantaaniriri irirori. Irootakerera kaari okantzimoneentavaitan-tana. ²Novashaantairo ovashiventavaite-nanemi, temacheeni nomanakaavaityaaro niyotaante onkantya namatavitant-tyaari, temacheeni nonthaiyakovaityaaro iñaane Pava. Aña okaratzinoñaaventa-nairi kyaaryoori onatzi, ari okanta iñaantarori Pava kameetha okantzimoye-taari atziri okaratzinokinkithatakaantayetai. ³Tzimatsirika kaari kemathaterone tsika okantakota Kameethari Ņaantsi nokinkithatziri, tera naaka omanapitha-vaiterine, aña tzimatsi kantakaarori kaari ikemathatantaro okempivaitakaromi impashikapithataitayeerimeri ikinkishire-tane, iriitakerera peyashivitaachaneri. ⁴Okempivaitakaro imavityaakitakaita-

tyeerimi irikaite kisoshireri. Iriira kamaari ipaiyetziri “ivavane osavisatzi,” mavityaakitakaakeriri, ari okanta kaari ikemathatantaro Kameethari Ñaantsi. Kempivaitaka te iriñaayetairomi kitainkari oshiyakaaventachari irovaneenkarro Cristo, oshiyajaantakariri Pava.⁵ Iritakera Jesucristo noñaaventakotairi, nokantzira: “Avinkatharite jinatzi.” Tera naaka ñaaventavaitachane. Intaanimacheeni naaka jovakena Jesús pomperavaitaiyaana erokaite. ⁶Tema ikantake Pava: “Onkitainkatai tsirenikiri.” Irootakera oshiyakaaventacha ikitainkashiretaana naaka, ari okanta nonkitaitakontantaiyaariri eejatzí pashinepayeeni niyotakaayetairira Pava, onkempitzimotantaiyaariri iriroriite iriñagaatyeromi irovaneenkarro Pava oshipakiryaaake iporoki Cristo.

Aventaashire ankantayetaya

⁷Okempivaitakaro impaityaami ovapithaantavaityaaronemi pinaperotachari kovitziki. Iriira oshiyakaaventachari jika Pava ipasavyaayetairo itasorenka avathaki, iroora avatha oshiyakaaventakari kovitzi. Iro jimatarorori onkantya iriñeeantanyaarori iriitake otzimimoperotziri itasorenka, temacheeni ontzimimotai akaite. ⁸Tema nokemaantsivaiveta, temaita novashireeneentavaitya. Notharokyaavaiveta, temaita ayimavaineentena. ⁹Ipatzimaminthavaitaitakena, temaita irookaventayeetena. Jovatsinaavaitaitakena, temaita impeyakaashiyaana. ¹⁰Oshekira jovamayimavetaitakana ikempitataitakeriranki Jesús, arira iriñaayeetairori irañaantare Jesús. ¹¹Jiroka kantakotachari, osheki noñaapiintavetakaro nonkamimatzimo-venteromi nokinkithatakotakeri Jesús, ari onkantya iriñaayetakenarika atziri, iriyoyetai tsika ikanta Jesús jañi irirori. ¹²Iroora nokamimatantakari naaka,

onkantya pañaashiretantayetayaari eerokaite.

¹³Iroora nomatakeri naaka okaratzi josankinatajaantakotaiyeetakari pairani, kantatsiri:

Nokempisantanai naaka, irootake noñaavaitantari.

Irootakera nomatanairi naaka, nokempi-santanai, irootake noñaavaitantari.

¹⁴Tema niyotzi naaka joviriintairi Pava irika Avinkatharite Jesús, aritake iroviriintaina eejatzí naaka, intsipatakgaiyanari Jesús, ari pintsipayetayaana eejatzí erokaite. ¹⁵Nomatantarori nokinkithatayetai ari onkantya panintaa-vaitantaiyaari eerokaite. Tema eekerorika poshekiperotanakitye eerokaite ineshinonkayetaari Pava, ari iroshekipe-rotai paasonkeyetapiintairine, iñaapin-kathatairira.

¹⁶Irootakera kaari okantzimoneentavaitantana naaka, okantavetaka jovamayimavaitaitakena. Aña tharomentashire nokantapiintanaa. ¹⁷Okaratzi nokemaantsvaitaka iroñaaka kapicheeni onatzi, eero okantaitatyaa. Irootakera noñaantaiyaarori apaata iniroite ovaneenkatchari kaari thonkanetaachaneri. Iro anagairone okaratzi nokemaantsivaivetakari, eerora okantajatai nomonkatziyantaiyaaro ompaityaarka. ¹⁸Tema noñaamampyaatyaaaro naaka kaari iñaayeetzi iroñaaka, eeromaita othonkanetaa iroka. Te onkovaperotajaantaiya okaratzi koñaayetatsiri iroñaaka kaari kisotanetatsine.

5 ¹Onkantavetya irovaariperoyeetzi-tairo apango jika kipatsiki, irokantacha ayotzi tzimatsi pashine apango kaari thonkanetaachane janta inkiteki, tema iri Pava ovetsikakero, kaarira atziri ovetsikerone. ²Ari okempitzitarieejatzí avatha iroñaaka, osheki okemaantsitakavaitakai. Akovataike ontzimimotai pashine avatha añaantaiyaari inkiteki.

³Tema aritake onkantyaari, okaratzia shireka iroñaaka ari ontzimai ovakerari avatha apaata. ⁴Eenirora añaantayetaro avathaka iroñaaka, atekavaita akemaantsivaitara. Iro kantamaitacha tera ankova jaantataitero ampeyashivaitiya. Aña akovataitazziira ontzimimoyetai pashinetatsineri avatha, akovairo kantaitachaneri añaantarentsi impoyaataiyarone iroka añaantare kaari kisotanetsins.

⁵Iriitakera Pava matakaayetairone tsika ankantayetaya. Tema afiirora jotaanya-kairi Tasorentsinkantsi inampishirentai, ari ayotziri omapero imonkaratairo Pava okaratz iшинетакири.

⁶Irootakera shintshiretakairi. Tema ayotaiyini eekerotatsira añaayetzi iroñaaka avathaki, tekeraatara antsipata-jaantyaariita Avinkatharite. ⁷Aventaa-shire oviri eeniroka añaika, okantavetaka te añaavetyaari. ⁸Aritake nokantake, shintshire akantaka, akovayetake ookaventayetero avathaka, antsipatantai-yaariri Avinkatharite. ⁹Akovapiintakero antayetero okaratz onimotziriri irirori, etanakyaaro iroñaaka, ari onkempitzi-tyaari apaata aririka antsipataanta-yaari. ¹⁰Tema maaroite aakaite ari ankatziyimo-yetairi apaata irirori, aririka irisaikai iramenakoyetairi maaroiteni, irifñaantai-yaariri ikaratz antayetakerori kaariperori eenirora jañaaveta, iritakera irovaska-tyayetairi. Iramenakoyetairi eejatz ikaratz antayetakerori kameethari, iritakera inkempiantayetairi impinayetaatyerimi.

Amatakaayetairi pashine irariperotaiyaari Pava

¹¹Nokinkithatakantapiintzira naaka, arira nokenakairori irifñaantayeetylaria oromapero noñaapinkathatairi Pava. Jiyotziro irirori, onkamintha piyotaiyeroni eejatz eero kaite. ¹²¿Pikinkishire-tama nasagaaventavaitatya napiipiitanta-

rori? Tera ari onkantya. Aña nokovatzi piyote tsika nokantataitari naaka, ari onkantya piyotantyaarori eero ka tsika pinkanteri pakayeteri kameethaini ikaratz asagaaventavaitachari janta, kantavaitashitachari: "Kameethari nonatz naaka," temaita inkovaajataiyeni inkameethashiretaiyeni. ¹³¿Nokempitzimotatyamirima shinkiventavaitachari nokantayetamiri? Tekatsira ompaitya, aña nokamaiperovetanaatyari Pava. Irooma nokempitzimotamirika atziri tekatsitsirs, nokovatziira nanintaashire-takaayetyaami nokantayetantamiri.

¹⁴Okaratzira nantayetziri, iroora nantantayetarori jetakotaanara Cristo. Tema ikamimentayetaira maaroiteni aaka, okempivaitanakaro maaroitenimi aakaite ankamayetakemi eejatz.

¹⁵Jirokara opoñaantari ikamimentanta-kairi maaroiteni ipoña jañagai eejatz, onkantya antapiintayetantaiyaarori ikoviri irirori, eero antashivitaro okaratz anevetashivitaro aakaite.

¹⁶Irootakera, eero okantzimovaitantari aparoni atziri tsika ikanta inéetziri ivathaki. Aña omaperovetata otzimimota-keri ivatha eejatz Cristo isaikimotanta-paintairi. Iro kantacha te añaayetzimai-tyaaro iroñaaka. ¹⁷Irootakera nokantanta-miri, ikaratz ovithashiretanaariri iroñaaka Cristo, ovakerashirera ikantata-tanaa, te inkempiantaiya tsika ikantavetara pairani, aña othotyaa maaroni ovakeratzimotanairi. ¹⁸Iriitakera Pava matakaantzi-rori maaroni iroka. Irijatzira kantakaakarori okanta ariperotantaariri irirori okantakaantakero jantzimoyetairi Cristo. Ikantayetai iroñaaka irojatzira antayetairi aakaite, amatakaayetairi eejatz pashine-pyeeni irariperoyetayaari Pava. ¹⁹Iroota-jaantakera jotaanyaantakariri Pava jakakipatsiki irika Cristo, onkantya irariperotantaiyaariri osavisatziite, eero jovasankitaaventantaari iyaariperonka. Irojatzira

jotaantayetantanakari naakaite nonkinkithatakaayetairi atzirite irariperoyetaiayari Pava. ²⁰Iroora nomatanairi naaka, jotaantaitakena noñaaventairi Cristo. Okempivaitakaro iriitajaantakemi Pava apipiitakaa-piintakenarori, nokantzi: “Pariperotaiyari Pava. Irootake ikovairi Cristo.” ²¹Tera irantanetero Cristo kaariperori. Iro kantacha Pava ikemaantsitakaavaitakari okempivaitakaro irantatyeeromi kaariperori. Arira inkenakaakerori Cristo, jovatampatzikashireyetantairi, ikempita-kaayetai ikantara irirori.

6 ¹Naakatakera karataimiri antavaitaineri Pava, noshintsithatzimi eero pimanintavitziro okaratz ikanmintha-gaimi Pava, amenaashivaitakari. ²Tema jiroka ikantakeri irirori:

Niyotakera kameetha omaty, aripaitera nokemakemiro pikovakotanari.

Omonkarapaitetapaakara “Kitaite Avisakotaantsi,” noneshinonkata-kami.

Iroora apiipaitetaachari iroñaaka, iroka “Kitaite Avisakotaantsi.” ³Tera nonkovero intzime impaitya notzitzikavaiteri iravisakoshiretai, ari onkantya eero ithainkimavaititantanaro nantavaitane. ⁴Aña nokovatzi noñaakantairo kameetha inampitane Pava nonatzi, oisokero nonkantanetya, aririka avishimotena tsikarika ompaitayetya: inkemaantsitakaaveetyaana, impomerentsitakaavee-tyaana, irovasantitaaveetyaana, ⁵impasateveetyaana, irashitakovaiveetyaana, irovatsinaavaiveetyaana, nantavaiperokivetya, ayimavaivetakyana novocho-kini, ayimavaivetakyana notashe, ⁶kiteshire nonkantaiya, iyotane nonkan-taiya, aakameetha nonkantantai, nethaantane nonkantantai, nampshire irovaina Tasorentsinkantsi, etakoperotane

nonkantantai, ⁷nonkantapiintairo kyaaryoori, intasonkaventakaantaina Pava, nantapiintairo tampatzikashireta-kainane nonkempitakaantanakero novayirityaami, notzikaaventaka ipoña nopiyakoventa. ⁸Onkantavetakya inthain-kimavaitaitena, ompoña ñaapinkathataarrika nonatye. Onkantavetakya inkaviya-veetakyana, ompoña intharomentayee-tyaana. Onkantavetya nonkantapiintave-tyaaro kyaaryoori, ipaitapiintayetakena “thairi.” ⁹Onkantavetakya eero itzimaveta kaari ñaayetenaneri naaka, tzimamaitacha pashine iyoperoyetanari. Nonkamimavetakya, eeniromaita nafii. Irovasankitaaveetakyana, tekeramaita jovamaayeetana. ¹⁰Ovashire nonkantavetakya, eekeromaitaty nontharomentayee-tya. Nonkovityaaneentavaavietakya naaka, iro kantacha nanintaakaayetai-yaari pashinepayeeni. Tekatsi tzimimo-vaivetyaanane naaka, iro kantamaitacha nanintayetaaro kovaperotajaantachari.

¹¹Corinto-satziite, nokantaperotatziimiora irokapayeeni, tekatsira nomanimovai-temiri. ¹²Tekeraatarika aventashiretava-kaiyaata, eerkaitera kantashitarori, tera naaka. ¹³Intsityaa paakameethataina naaka nonkempitaimira eeroka, tekatsi nomanimovaiitemi. (Nokantzimirora iroka, kempitavaitakara eentsimi noñaanate.)

Oshiyayetaaro itasorentsipankote Pava Kañaaneri

¹⁴Eero povithaajaantanaari kaari kempisantsatsine. ¿Kantatsima aparoni kameethashireri iraapatziyaari irantavaita aparoni kaariperoshireri? ¿Kantatsima eejatzti ontsirenite tsika janta okitainkatzi? ¹⁵¿Kantatsima Cristo irakakoteneri ikoviri kamaari? ¿Kantatsima kempisantzinkari intsipatyari kaari kempisantsatsine irashityaaro tsikarika ompaitya?* ¹⁶¿Kanta-

* 6.15: Jiroka pashine ivairo kamaari ikantayetetziri “Belial.”

tsima ankempitakaantero itasorentsipan-kote Pava tsika janta iñaapinkathataitziri oshiyakaarontsi? Tema aakaite akaratzi akempisantzinkariyetai akempitayetaa-tyaaro aakami tasorentsipango tsika inampitaro Pava Kañaaneri. Tema jiroka ikantake Pava:

Ari nonampishireyetantaiyaari,
nonkaratairai naniiyetai.

Naakatake inkempitakaantai Ivavane,
Iriiyetake nashitaiyaari Naaka.

¹⁷Iroora ikantantari eejatzi Avinkatharite:
Pintainaryaapithatyari pashinesatz
atziri, eero pikaraminthatziri
irikaite.

Eero pantapiintanetairo nopinkakai-miri.

Arira naapatziyeeyaami,

¹⁸Arira pinkempitakaantaina naakami
piri,

Nonkempitakaantaimi naaka eeroka-yetakemi notomiite, eerokayeta-kemi nishintoite.

Arira ikantziri Avinkatharite, Shintsikiper-rotatsiri.

7 ¹Netakotané, tema aritakera ishinetakairora Pava, ontzimatyera ankiteshiretai, ovashaantairo maaroni kaariperori, okaratzi antayetziri, okaratzi apampithashireyetari eejatzi. Aña ontzimaty oñaakantairo añaapinkathatziri Pava, itasorentsishiretakaira.

Ikimoshiretake Pablo jovashaantairo Corinto-satzi kaariperori

²Paakameethataina naaka. Tera nonkantzimoneentakaavaityaami eerokaite, te novaariperotakaantavaitemi, te nampovaitami eejatzi. ³Tera iro nokantantarori iroka nothavetakota-tziimi. Aña napiitavaimiro nokantzitakamiri: "Netakoperotataitami." Irootakera nonkantapiintemiri eeniroka akarataiyini añaika iroñaaka, ari nonkempitzyaarori eejatzi ankaratairika ankamavetakya.

⁴Osheki naventaashireyetakami eerokaite. Nasagaaventayetakami. Aririka nompampithashiretakoyetyaami, pitharomentashiretakaana, kimoshire nokanta, okantavetaka osheki imaimanevetakana jaka.

⁵Tema nareetakara Macedonia-ki te onkante nomakoryaapaake tema osheki pomerentsitzimotakanari. Tzimayetatsi ñaanaminthavaitashitakanari, irootake kantzimoshirevaitakanari. ⁶Iro kantacha Pava iposhenkapiintari ikaratzi okantzmoneentavaiyetari, arira ikempitzitakanari naaka, jareetakaapaakarira Tito nosaikira. ⁷Oshekira notharomentashiretanaka noñaavakeri. Iroora notharomentashirereperotantanakari ikamantapaake-nara tsika pikantaiyani eerokaite. Tema ikantapaakena: "Jaakameethatavakena Corinto-satziite, ikovaiyakeni iriñeemi, osheki okatsitzimoshiretakeri okaratzi jantzimotakamiri, iriniroite jetakoyetaami." Arira ikantapaanari, iroora oimoshirenkaperotakenari. ⁸Pairani, nosankinatzitantakamiri, noñaajaantavetaka osheki ovashiretakaavaityaami okaratzi nokantayetakamiri. Aritakera notyaantataikemirranki, nokantashirevitanake: "Eerotya notyaantaaajatzinirimi." Iro kantamaitacha niyotzi iroñaaka kapichera povashirevaivetapainta eerokaite. ⁹Irootakera nokimoshireventtarori iroñaaka notyaantakemirora. Tera nonkantatyte iro nokimoshireventziri novashiretakaavaitakami. Aña iroora nokimoshireventairi povashaantayetaira kaariperori. Arira pikenakaakero eerokaite pinimotakaantaariri Pava poitsinampaayetakero povashiretane, tera novaariperovaitajaantemi naaka.

¹⁰Tema aririka irovashiretakaantya Pava, ikovatiira irovashaantakaantayetairo kaariperori, onkantya iravisakoshireyeytantaiyaari. Irootakera eero okantzimoshirevaitantai iroka. Irooma aririka

irovashiretakaantashivaitya osavisatziite, arira iriñaayeetakero inkamashireyeete. ¹¹Tema okaratzzi opoñaantakari jovashiretakaavaitakami Pava, irootakera pampithashiretakaanaamiri kameethape-roini, pikisakoventanaana, ovatsimaanakemi, tharovashire pikantanaka, petakoperotanaana, povasankitaakeri kantakaantzirori. Ari pikenakaakerori poñaakantantakarori kiteshire pikantayetanaa. ¹²Jiroka opoñaantajaantzitakari nosankinatantakamirori pairani, iro iriyotakaantaiyaamiri Pava tsika pinkantya piñaashintsiventayetayaana naaka. Tera iro nosankinamatsitantlyaarori irovasankitaantaityaari kantakaashitakarori, temacheeni nonkisakoventantyaarori jampovaitaitakari.

¹³Iroora notharomentashiretantanakari. Osheki okimoshiretakaakena eejatzi nokemavakera paakameethatavakeri Tito, povavisaakeneri okantzimoshirevaivetakari irirori. ¹⁴Tema aritake nokamantzitakari naaka Tito tsika pikantaiyaneeerokaite, nokantakeri: "Kameethara jinaiyatiini Corinto-satziite." Tera povashiventaantyaanaro okaratzipantayetakeri, tema omaperotatya okaratzzi nokantzitakariri Tito. Arira okempitziyetakari eejatzi okaratzzi nokantzimiri eeroka. ¹⁵Jetakotziyyetaamira Tito iroñaaka, aririka inkinkishiretakoyetyaami tsika pikantaiyakanipaakameethatavakeri, pikempisantavakeri, piñaapinkathatavakeri. ¹⁶Iniroitera nokimoshiretzitaka eejatzi naaka kantatsira naventashireperoyetayaami iroñaaka.

Kireeki impashiyetyaariri itasorentsitakaitane

8 ¹Iyekiiite, nokovi piyotakotaiyerini ikaratzzi apatoventaariri Pava jaka Macedonia-ki, ikaminthayetairi.
²Okantaveta iñaayevetakaro osheki

pomerentsitzimovitariri, kimoshirera ikantaiyani. Okantavetaka ikovityaaeenetavaivetaka, osheki kireeki ipashitantayetakari. ³Ikovakaanekiinira irirori jantayetakero iroka, ipantayetake okaratzijaavyaayetziri, janaantake ipashitanta. ⁴Ikantakena naaka: "Thame ampashiyetyaari kireeki pashine kempisantzinkariite, ikaratzzi kovityaaeneentavaitatsi." ⁵Imaperovaitakero okaratzzi jantakeri anaavaitanakero nokinkishiretakovetakariri. Iri jaakoventajaantanaka Avinkatharite, ari ikempitaakenari eejatzi naakaite. Tema irootake ikovakaakeriri Pava. ⁶Irootakera noshintsishtantakariri Tito impiyanai onkantya iriminthalashireta-kaantyaamiri pimatayetairo eejatzi eerokaite. Iriitakera karatapaakemiri janta petantanakarori pipashitantayetaka. ⁷Erokaitera anaantayetanaatsiri pantayetanakero osheki opaiyetarika. Kameetha pikempisantayetanai, kameetha pikinkithatakanayetanai, kameetha piyotayetanai, tharomenta pikantayeta, iniroite petakotakana. Nokovi iroñaaka panaayetante pimpashitayetayai.

⁸Eerora noshintsvintzimi pimayetanyaarori. Intaani noñaaventakoyetemiri tsika ikantayetaka jaka iminthatayetaa irineshinonkatantya. Ari okantzimaitari eejatzi onkameethavaitemi poñaakantairo petakotziitayeta. ⁹Kameethavaitake pimayetairomi jantapaintziri Avinkatharite Jesucristo, jineshinonkatziitapinta. Otzimimotataavetari irirori pairani maaroni, ikempitavaitakari ashaarantakitaneri, iro kantacha ikempitakotapaintari kovityaaeneentaneri. Iroora jimataktakarori iroka onkantya panintaavaitantaiyaari onkempivaityaa-romi pashaarantaiyaami inkiteki. ¹⁰Jirokara okaratzzi nokinkishiretarinaaka: Iroora aritatsi pothotyeero okaratzzi petanakari. Eerokaite etayetana-

karo avisanaantsiri osarentsi pikinkishire-taka pimpashitantayeta. Pimatakeror petanakaro.¹¹ Intsityaa pothotyeero. Pinkempitakaantairo ovakera pitharomentaiyanakaniranki petantanakarori. Intsityaa pothotyaantyaa okaratzi tzimimotzimiri.¹² Tera inkovakotajaantai Pava anaakairo ampashitantlyaa okaratzi tzimimotakairi. Intaani ampashitantlyaa okaratzi aavyiiri. Aritake onimotakeri Pava.¹³ Tera nonkovakota-tyeemi pimpashitantlya iranintaavaitanyaari pipashitakari, ariya okanta pikovityaavaitantakari eerokaite okantakaantziro pipashitantaka.¹⁴ Aña iro aritatsi, pimpashityaari okovityiimovaitari iroñaaka otzimimoyetzimira eeroka, impoñaashitakya impashitai-yaami eeroka apaata aririka onkovityiimovaityaami. Arira onkantya pimonkara-tavakaantyaa. ¹⁵ Okempivaitakaro okaratzi josankinatakotzitaitakari, kantatsiri:

Itzimi aaperotaantsiri, te ontzima-kaantavaite.

Iriima againtsiri kapicheeni, te onkovityiimovaityaari.

¹⁶ Nopasoonketziri Pava, tema irikitake kantakaakarori okanta jetakontamiri Tito, ari ikempitakana naaka netakotamira.¹⁷ Tema nokantakeri: “Tito, pimpiyanai Corinto-ki.” Aña minthatzitavaitaka. Iro iriyate iroñaaka.¹⁸ Notsipataimiri Tito pashine iyeki. Kameetha kinkitharyaantzi inatzi. Ņaapinkatha jovayetziri pashine kempisantzinkariite tsikarikapayeeni, ikemayetakerira iñaaventakotairo Kameethari Ņaantsi.¹⁹ Irijatzira iyoshiitakeriri jakat kempisantzinkariite, jovakeri intsipatanakyana apaata naanakeneri kireeki pashine kempisantzinkariite kovityaavaitatsiri. Irootakera oñaakanterone omaperotaty-

etakoyetakari, iroora ompoñaantyari iñaapinkathayetairi Pava.²⁰ Ari onkantya eero iñaaventakovaitaitantana tsika nonkantya nontsiparyaa yeteri kireeki ipashitziantayetari.²¹ Tema nokovatzi onkameethatzimoteri atziri nantayeteri, ari onkempitzimotaariri eejatzi Pava.²² Notyaanteri eejatzi pashine iyeki intsipayetanakyaa. Iriitake nokitapiintakari, iminthakitakaro irampitakotante. Noñaaventakotakeneri tsika pikantaiyakan eerokaite, iroora iminthaperotantanakari irampitakoyetemi, tema iraventaa-perotane jovayetanakemi.²³ Irika Tito, notsipaminthare inatzi, iri nokaratapiintakari nantavaiventakemi. Iriima pashine apiteka iyeki itzimi intsipatanakyaa, irotyaantane inatzi kempisantzinkariite saikayetatsiri jaka, iñaapinkathaperotziri Cristo.²⁴ Ontzimatyeera paakameethata-vakeri aririka irareetakya janta. Iro iriyotantyaari iyekiite kempisantsiri jaka omaperotatyara okaratzi noñaaventakemi eerokaite jaka.

9 ¹ Niyotzi naaka te onkovajaantya nosankinatakotemiri piireekite inkarate potyaanteneriri pashinesatzitasonrentsitakaitairi. ² Tema niyatke ayimatapiintakemi eerokaite pantero. Aritake noñaaventakotakemi jaka Macedonia-satziki, nokantayetakeri: “Ikovitzitataikara Acaya-satzti impashitantlyeta chapinki avisanaantsiri osarentsi.” Noñaaventakotakemira eerokaite nominthatakayetanakari eejatzi iriroriite. ³ Iro kantamaitacha, iroora notyaantitantlyaamiriri iyekiite onkantya inkamantzitantlyaamiri, iri etapaakyaa-rone iriyoyaayeteri kireeki. Tema te nonkove amenaashivaitya okaratzi noñaaventakemiri eerokaite jaka. ⁴ Tema nokovatzi thaankiini nonkivantananakeminavisanakerika janta. Kempitakara ari

* 9.2: Ipaitayeetziri jaka “Acaya,” iroora kipatsi tsika janta osaiki nampitsi Corinto.

iroyaatanakena tsika inkarate Macedonia-satz. Aririka noñaapaakero tekeraminta piyoyaayete kireeki, osheki nompashiventavaitya, tema aritake noñaaventakotzitakami jaka. Ari pinkem-pitzitakyaari eejatzi eerokaite pimpashi-ventavaitya. ⁵Irootakera notyaantztanta-tyaamiriri irika iyekiite, iri etapaakyaa-rone irareetyaami janta tekeraminta niyaateeta naaka. Iriiyetake iyoyaakota-paakemirine kireeki ikaratzi pishinetanta-keri eerokaite. Ovetsika pinkantakeri maaroni kireeki aririka nareetapaaky. Ari onkantya eero noshintsiventavaitapaakami pantayetero.

⁶Intaanira pinkinkishiretero iroka:

Ikaratzi pankitatsiri kapiche, eepicho-kiini jaavatzi.

Iriima ikaratzi pankiperotaintsiri, osheki iraavateri.

⁷Maaroni eerokaite ontzimaye pimpashi-tantayetaiya okaratzi pikoviri. Eero pishintsiventavaitizi impashitantaitya osheki terika inkovaite, ari onkantya eero okatsitzimoshirevaitantari ipashitanta-kara. Tema aparoni atziri kimoshireven-tatziitzirori okaratzi ipashitantar, iriyyetakeria jetakotari Pava. ⁸Iriira Pava oshekyaperotaimirone okaratzi kovityii-movaitamiri. Aritakeria ontzimakaantake onkarate pimpashitavaitaiyaari kameethaperoini eeroka. ⁹Okempivaita-karo okaratzi ūaaventachari Osankinaj-anorentsiki, kantatsiri:

Okaratzi tzimimotziriri Pava, irootakera jantetaaniriri ikaratzi kovityaaeentavaitatsiri.

Tema tampatzikashire inatziriri, arira inkantitatyeeyaaani.

¹⁰Iriira Pava kithokitakairori okaratzi pankiyetachari, irijatzi shookakairori, ari okanta jaavayeetantarori okaratzi jovayeetari. Arira inkempitayetaimiri eejatzi eerokaite impayetaimiro kovityii-motamiri, ari onkantya ontzimimotantai-

yaamiri pimpashiyetaiyaariri pashinepa-yeeni, tampatzikashire pinkanty.

¹¹Irootakera impantaperotantyaaamiri Pava onkantya pimpashitantapiintyaari. Ari onkantya impaasoonketantyaariri Pava, ikaratzi aayetzirori apashitantaye-tari. ¹²Ari okantari, okaratzi pipashitanta-yetari tera intaani pineshilonkatantyaariri kovityaavaitatsiri, aña iro ompoñaantyaa-ri impaasoonkeperoyetairi Pava.

¹³Aririka iriñaayetakero okaratzi pipashi-yetakariri, ari pikempitzietakari eejatzi pashinepayeeni, oshekira iriñaapinkatha-nakeri Pava. Tema iriñaayetero tera intaani piñaavaitashiyeta, pikantzi: “Nokempisantairi Cristo oñaaventakotairi Kameethari ūantsi.” Aña iriñaayetero eejatzi pantayetziro oñaakantzirori omapero pikempisantayetanai. ¹⁴Iroora ompoñaantanakaari iretakotziyetanai-yaami, iriñaañatakoventanaimi, okantakaaro ikaminthagaimira Pava.

¹⁵Ari ankempitzitanaiyaari eejatzi aakaite ampaasoonketanairi Pava, tema ineshinonkatataikai aaka, iro maperokita-tatzirori okameethatzi, eero okantzi othotyeero añaaventero.

Iñaaventakotziro Pablo okaratzi jantayetziri

10 ¹Naakatakera Pablo, tzmatsira nokovakotzimiri. Tsinampashire nonkantya eero notsimaavaitami, nonkem-pitakotaari Cristo. Tema niyotzi tzmatsira ikantakoyeetakena: “Irika Pablo tsinampashireri jinatzi isaikimotapiintai, irooma isaikira intaina katsima ikanta.”

²Nokovakotzimi, eerora piyaatakairo povatsimaavaitena. Ari onkantya eero niyakoventavaitapaakami aririka nareetapaakyami. Tema niyotataike arira nonkantayetapaakeri ikaratzi saikimoyeta-kemiri janta kantayetaintsiri: “Tekatsi impaimatsiya Pablo, ari ikempitayetari pashine atziriite te ontzimimoteri

ishintsinka.”³ Omaperovetaty ari nokempitari pashine atziriite, iro kantacha irika itzimi nomaimanetziri, tera onkempi-tyaaro nomaimanetziri atziri. ⁴Tema aririka nomaimanetante naaka, tera noirkayetero omanamentotsi okaratzi jomanatantapiintayetari atziriite, aña itasorenka Pava nomaimanetanta naaka. Arira okanta noitsinampaayetantariri ikaratz iishintsitakaayevetakari noiseen- tane.⁵ Arira okanta nokitsirinkantaariri naakaite maimanevaitaneri, nokitsirinka- yetairi asagaaventavaitaneri otzitzikatan- tatsiri kaari jiyotakoyeetantari Pava. Nokempitakaantaaro eejatzi noirkayatye- romi nokinkishiretashivaiyetari, noshintsi- ventaatyeyaaami nonkempisantairi Cristo.⁶ Aririka nonkemakoventaimi pipiyashi- taari eerokaite pikempisantaperotairi eejatzi, aripaitera novetsikya novasankita- yeri inkarate piyathayetachaneri.

⁷Paamaiyaara jovapyiimovaitamikari. Tema tzimayetatsi pikarataiyirini kantayetsatsi: “Jashitana naaka Cristo.” ⁸Ilkinkishiretaiyama te jashitzitana eejatzi naaka? Irorika ikinkishireyetakari, ikenakaashitakarora, tema naaka jashiperotataika Cristo.⁹ Aamaashitya ari pinkantayetanake eerokaite: “Jetanakaro iroñaaka Pablo jasaagaventavaitaro okaratzi iñaaventayetziri.” Tera nompashiventakotaaro okaratzi inkanta- yeeteri, tema iriitake Avinkatharite ovakenari niyotaantayetai, tera irovena novaariperotantavaite.¹⁰ Irootakera kaari nokovanta onkempitzimotyaami okaratzi nosakinatakemiri, nokovatziira nomintharovavaitemi.¹¹ Aamashitya tzimayetatsi kantayetsatsi: “Tema jotaantapiintairora Pablo irosankinare, osheki iishintsithatapiintakai, iñaaventa- piintayetakairo pomerentsitzimotairi antayetero. Iro kantacha isaikimoyetaira jaka, kempivaitaka te irishintsitanete. Ikkantara ikinkithayetake manintaari

jinake.”¹² Jiroka nakayeteri ikaratzi kantayetsatsi, nokantziri: “Tsikara nokanta nosankinayetakemi, arira nokantzitakari eejatzi nosaikimoyeta- kemi.”¹³ Tera nonkarateri naaka pikaratziri pisaikeyini janta, asagaaventa- vaitachari. Te iriyotaajataiyeni irirori. Tzimatsi tsika ikaratzi monkaratapiintava- kaavaitachari, iñaajaantake janaavakaan- tayetaro okaratzi kameethatzimovaitashi- yetariri iriroriite.¹⁴ Irooma naaka tera nasagaaventashivaityaaro nomonkaratero kameethatzimovaitashitanari naaka, intaanira noñaaventairo nomonkaratakerero ikantakenari Pava irirori nanteneri. Jirokara ikovakeri nanteneri, ontzimatye noverairo nantavaiteneri janta tsika pisaikeyini eerokaite.¹⁵ Irootakera noñaashintsitakovoventantamiri iroñaaka eerokaite, tera nanaakaatyeyero okaratzi ikantakenari Pava. Tema naakatataike etakarori noñaaventakemiro Kameethari Ñaantsi tsika ikantakota Cristo.¹⁶ Iroota- kera kaari nokempitantari ikaratzi asagaaventashivitarori imonkaratane, aña tzimataavetacha pashine itzimi etatainakarori jimonkaratakerero. Iro kantacha iroñaaka, eekerorika pantakishi- revaitanakitye, eerora nopankiventavaita- naami eerokaite,¹⁷ kantatsi niyatayete pashineki nampitsi nonkinkithatakaan- tairo Kameethari Ñaantsi. Iroora nomateri, eerora nokenanake tsikarika jetayetakaro ikinkithatakaantzi pashine atziri, nasagaaventavaitarokari imonkar- tane pashine.¹⁸ Tekatsira apantyaarone irasagaaventashivaitaitya apaniro. Iroora apantaperotarori asagaaventaiyaa- jantayetziri Avinkatharite.¹⁹ Tema tekatsi ompaimatsitya asagaaventavaitya apaniro antharomentavaitya. Iroora kovaperota- chari intharomentatziiyetai Avinkatharite.

11¹Nokovi eekero pamavetayeo- okaratzi nosankinatzimiri jaka, onkantavetakya onkempitzimotyaami

jantziri aparoni masontzi. Nokovi eekero piyaataty piñaanayetero. ²Oshekira naamaakotakami eerokaite, iriira Pava kantakaakanarori. Tema naakatake etakaro nokinkithatakaakemi okanta jashitayetantaamiri Cristo. Nokempita-kaantavaitaami eerokatakemi nishinto, tzimatsimi nokashiyakaakamiri pintsipa-tyaari, aamaakoki novapiintanaimi eero pikaaiperovaitanta irojatzi paavakaanta-perotakyaari. Iriira oshiyakaaventachari Cristo, itzimi kempitakiriri iriimi paayetairimi apaata. ³Tema notharova-kaatyami intzime impaitya amatavite-mine, inkempitakotakyaari maranke amatavitareroriranki Eva. Aritake iroitzipinatakemi, irovashaantakaimiro paventagaari Cristo, pikinatanaarira.

⁴Kempitaka eerokaite, te pishenkaashi-tyaaro pakayeteri pashine ñaaventakote-mirine Jesú, ari pakakeri onkantaveta-kyia irinashitapaakyaro okaratzi noñaaventakotakemiri naaka Jesú, okaratzi noñaaventakemiro Kameethari Ñaantsi, okaratzi noñaaventakemiri Tasorentsinkantsi. ⁵¿Pikinkishiretama eerokaite janaakoyetana naaka jotaantajanoritzi irikaite? ⁶Aamaashitya te nonkinkithate kameethaini naaka, iro kantacha iyotane nokanta. Irootake piñaakoyetiintakenari. ⁷¿Nokenakaashitakaroma tera nonkovakotemi kireeki, nokinkithatakaayetakemirora Kameethari Ñaantsi ñaaventakotziriri Pava? Aña tsinampashirera nokantaka nantavaiven-takemi niyotaantayetakamirori, te nonkovakovaite. Arira okanta ikempita-kaantayeetaamiri iroñaaka iriiperori pinayetzi. ⁸Okanta nokinkithatakaapaa-kemiranki, iriira pashinesatzı kempisan-tzinkariite payetakenari kireeki nañaan-tari. Okempivaitakaro nonkoshitatyee-rimi iriroriite okanta nantavaiventantaka-miri eerokaite. ⁹Eenirranki nosaikimo-taiyimi, osheki nokovityaaneentavaitake.

Temaita noñe pimpena ompaitya nañaan-tyaari. Ikamintha jareetaiyaka iyekiite Macedonia-satzi, iriira payetapaakenari. Ari okantakari kaari noñaantaro pimpayetenä kireeki eerokaite. Arira nonkantapiintatyero eero nokampitzimi. ¹⁰Iniroitera nokimoshireventakero tera nonkovakoyetemi, arira nonkantapiinta-nakityeero maaroni nampsiiiteki okaratzi saikatsiri Acaya-ki. Jiyotziro Cristo kyaaryoora nokantake. ¹¹¿Piña-jaantzima eerokaite iro nokantantarori iroka tera netakotami? Jiyotzira Pava netakotami.

¹²Eekerora niyataakaatyero onkantya irikaite kinkithatakaaneri pasagaaventa-vitakari eerokaiteki, eero ikantanta: “Ari nokempitakari Pablo.” ¹³Irikaite kinkitha-takaaneri kaarira Otyaantajanori, amatavitaneri jinayetatzı, apanirora ikempitakaantashivaitaka iriirkami irotyaantajanore Cristo. ¹⁴Tekatsi ompaitya iromapokakaantairori iroka. Tema jimatzitaro ejatzi Satanás joshiya-kotari ishipakiryi maninkari onkantya iramatavitanattyari. ¹⁵Iroora eero jomapokantavaitai ikaratzi antavaiyetzi-niriri Satanás, irojatzira jimatzitaro irirori. Inkempitakaantavaitya jantavaitatzi onkantya inkameethashiretakaantaiyaa-riri atziriite. Arimaitaka irovasankitaa-ventayeetairi okaratzi jantayetziri.

Ikemaantsívaitaka Pablo Jotaantajanoriitzirira

¹⁶Intsityaa napiitavakero nonkantemi, onkaminta eero nokempitzimotamiri masontzi. Irooma nokempitzimotakamiri-rika, pishinetavakena nasagaaventavakya kapicheeni. ¹⁷Okaratzi noñaavaitziri iroñaaka, tera onkempitajaantyaaaro tsika onkantyaami iriñaavaiterimi Avinkatharite. Aña nokempitakotatyari aparoni masontzi jasagaaventashivaita. ¹⁸Arira ikantapiintayetakari pashine atziriite, ari

nonkantyaari naaka eejatzi.¹⁹ Pikempita-kaantavaitara eerokaite iyotaneri pinayetatzি, ḥopaitama pikovantaiyarini pinkempisantayetairi masontzi?²⁰ Iroota-jaantakera pantayetakeri eerokaite, pikempisantapiintakeri ikaratzi kempita-kaantavaitakamiri irotzikatane, aapithava-yetizimirori tzimimotzimirori, ampovai-yetakamiri, asagaaventavaitachari, pasavorovaiyetzimirori eejatzi.²¹ ḨPiñaa-jaantzima te naavyaavaitanete naaka nomatantyaarori kempitakarori?

ᧈKantatsima nompashiventakotyaro tera nomataitiero? Ferora. Iro kantacha aritake nantataitake kempityaarone okaratzি jantavetaiyakarini iriroriite, nasagaaventavaitya, onkantavetakya nonkempivetakyaari masontzi.

²²Irorika jasagaaventavaitaka iñaavaitziro noñaane Hebreo-thatatsiri, eejatzira naaka. Irorika jasagaaventavaitaka isheninkamirinkaitetari Israel-ni, eejatzira naaka. Irorika jasagaaventavaitaka icharinemirinkaitetari Abraham-ni, eejatzira naaka.²³ Irorika jasagaaventavaitaka jantavaiyetaineri Cristo, eejatzira naaka. (Omaperotaajataty nokempitakari naaka iñaavaitzi masontzi.) Iro kantacha nasagaaventaro nanaakovaitairi irikaite nantavaitzi, nanaakovaitairi eejatzi noñaapiintaktero jashitakovaitaitena, ipasavaitaitakena, jovamayimavaitaitakanra.²⁴ Noñaakero okaratzি japiitana ipasavaitana nosheninkapa-

yeeni janta japatotapiintaita.*²⁵ Mavasta-tzira okaratzি jomposavaitaitakena. Aparosatzi ipicheetakena. Mavasatzi nopitamenkakotaka. Aparoni tsireni nosaikakovaitake niyankyaaki inkaare, ari nokitaitakotakeri.²⁶ Osheki nokivan-tantayetake. Nokenayetake okoveenkaye-tzi jiñaa. Nokenimoyetakeri ipiyota koshintziite. Ikovayetake nosheninkapa-yeeni irovaariperovaitenami, eejatzi ikempitakari kaari nosheninkata. Nokoveenkatakavaitake nampitsiiteki eejatzi janta tsika te inampiitaro. Nokoveenkatakotake inkaareki. Osheki nopomerentsivaitakari paitashivaitachari “iyeki,” kaarimaita.²⁷ Osheki nantavai-take, ayimavaivetakana nomakone. Ayimavaitakena novochoki, notashe, nomire, noyatsinkare. Tasheneenta nokantapiintaka. Nomaavaitake tsikarika-payeeni.²⁸ Tzimatsi osheki avishimoyeta-kenari. Iroora kantzimoperotakanari irisaikayetai kameetha ikaratzi kempisan-tayetaatsiri tsikarikapayeeni.²⁹ Tzimatsi-rika mantsiyataintsine, nokempitakaan-taro naakami mantsiyataintsine. Tzimatsirika inkaariperotakaitakeri, oshekira nonkisakoventavaityaari.*³⁰ Arira okantakari nasagaaventavaita naaka, noñaaventakotakerora tsika nokantaka kaari naavyaavaitanetanta.³¹ Itzimi iyotatsiri te namatavitante, iritakera Pava, Ashitariri Avinkatharite Jesucristo. iTharomenta irovapiintayee-

* **11.24:** Oñaaventakota irosankinareki Moisés-ni, kantatsira irovaskaitaite aparoni atziri aririka irovaariperotakeri pashine. Ontzimatyie iraayeteri tsika japatotapiintayeeta, onkantya impasavaitantayeytaa-ri. Ferorika okaariperotzi okaratzى ikenakaashitakari, eerora ipasaveroitzi. Irooma omaperorika okaariperotake okaratzى ikenakaashitakari, ontzimatyie irovaskaitaaperoiteri. Iro kantacha tera oshinetaantsite iranaakaayeetero onkarate 40 impasavaitaiter. Irootakera jametaitakari pairani impasataite onkarate 39 itzimirika kaariperovaiperotaintsiri, ari onkantya eero ipiyathantaro ikantakaantitane, aririka iranaakaakero onkaratemi 40. Irootakera ipaiyetairi irikaite “Kovityapaaka aparoni omonkaratantyaari 40.” Okaratzى ñaaventakotainchari jaka, arira ikantaitakeri Pablo, ipasavaitaitakeri irirori. * **11.29:** Okantzira jaka “mantsiyataintsine,” kempitakara tzimatsi kinkishiretakotarori iriira ikantakoyeetzi aparoni shipetashirevaitatsiri javentaarira Cristo.

tairi! ³²Tema pairani nosaikantapaintari Damasco-ki, ikempoyaaventakaantakero ijevatakaane Aretas maaroni nampitsi, eero noshitovanta, ari onkantya iraakaantantyaanrimi. ³³Iro kantacha jotetakena kantziriki nokarataiyirini, jovaniiryaaokotakena jantakironta nampitsi, ari okanta noshiyantaari.

Kempivaitakarori ovathaantemi kitoochee

12 ¹Tera aritzi nasagaaventavaitya. Iro kantacha eekerora noñaaventatyereo noñaavyatkarri, okaratzi joñaakakenari Avinkatharite. ²Niyotakotziri irika shirampari jashitaari Cristo. Tzimakotake 14 osarentsi irika shirampari jaayeetairi inkiteki, jiyaaperotatzi ojenokitajaantzi inkite. Kempitaka jiyaashinenkatatz, te niyoperotzimaitya. Terika, jiyaatatzira koñaaroini ivathaki, te niyoperotero. ^{*}³Iriira Pava iyotsatsiri jiyaashinenkatatzirika, jiyaatatzirika koñaaroini ivathaki. Intsityaa netapanaa-tyaaro noñaaventakoteri irika shirampari. ⁴Jaayeetairira janta ikimoshireetapai. Ari ikemayetairori tsikarika opaiyetari kaari kantaajatatsine iriñaaventakoyeetero. ⁵Arivetaka irasagaaventyaaromi irika shirampari okaratzi iñaakeri. Iro kantacha eero nasagaaventavaita. Intaani noñaaventakotakero tsika nokantaka kaari naavyaavaitanta. ⁶Arimi nasagaaventakyaaromi okaratzi noñaayetakero, eeromi nomasontzishirevitzimi. Aña aritakemi noñaavaiyetakeromi kyaaryoori. Iro kantacha tera nonkove irasagaaventashivaitapiintaityaana. Intaani iñaapinkathaventaitenaro okaratzi nantayetakeri, okaratzi ikemako-yeetakenari. ⁷Okaratzi noñaavyatkarri

ovaneenka okantaka, jiyyotake Pava aritakemi nasagaaventavaitakyaami. Irootake ishinetantakanarori nonkemaantsvaitya onkantya eero nasagaaventanta-vaita. Okaratzi nokemaantsvaitapiintaka okempivaitakaro ovathaavaitayeenami kitoochee. Iriitakera kamaari kantakaarori okanta ikemaantsvaitakaantaitakanari.

⁸Mavasatzira nokovakotakeri Avinkatharite intsiparyaa koventaina ikemaantsita-kaapiintaitana. ⁹Ikantakena irirori: “Tema aritake nokamintaavaaitakemi, tekatsira kovityiimovaityaamine. Aña kantataitatsira noñaakantaperotairo noshintsinka atziriki kaari aavyaavaitatsi-neri.” Ikanta nokemavakerora, kimoshire nokantanaka, nominthatanakaro noñaaventayetairo tera naavyaavaitanete, tema ari onkantya aavyaavaitakaantai-yaanari ishintsinka Cristo. ¹⁰Irootake nokimoshiretakarri naaka okantave-taka te naavyaavaitanevetya, ikaviyavaitaitana, nokemaantsvaitaka, jovatsinaa-vaitaitana, opomerentsitzimovaitana, osheki noñaayetakeri nantavaitziniri Cristo. Niyopaitairora te naavyaavaita-nete apaniro, arira noñaataitzirori jimatakaatyaaanaro naavyaavaishiretane-tai.

¹¹Kempitaka masontzi nonake noñiirora nasagaaventavaitaka. Eerokamaitaka kantakaarori nomatanta-karori. Iro arivetacha piñaaventayetainami kameethaini. Okantavetaka te niriiperote naaka, te iranaakotzimai-tyaana irikaite paitashivaitachari “Iriiperori Otyaantajanori.” ¹²Tema nosaikimovaitakemiranki eerokaite, noñaakakemiro omapero naaka Notyaan-tajanoritzi. Osheki namatsinkavaivent-

* **12.2:** Kantakotachari jaka “ojenokitajaantzi inkite,” iroojatzira ikantayeeztitarri “mavatanaintsiri inkite.” Ari ikantayetapiintziri judío-payeeni iñaaventziro. Ikantaiyini: “Etanakarori inkite, ari osaikayetziri menkori. Apitetanaintsiri inkite, ari isaikayetziri kashiri, ooryaa, impokiropayeeni, maaroni. Irooma mavatanaintsiri ojenokitajaantzira inkite, arira inampitarori Pava.”

kami. Osheki notasonkaventantake, te piñaapiintaiyeroni, irootake pikempoyaa-minthatantakarori.¹³ ¿Opaitama pikinkishirevaitantari iroñaaka nomanintavaitatzimi? ¿Tema naakameethatemi nokempitairira pashine kempisantzinkariite? ¿Irooma kantakaantarori tera noñe ompaitya pimpashityaanari? Tzimatsirika nokenakaashitakari, pimpeyakotenaro.

**Iñaaventziro Pablo
mavatanaintsine inkivantante**

¹⁴Nokinkishiretaka iroñaaka napiitairo niyaatashitemi, iroora mavatanaintsine nonkivantemi. Eerora nayiri inkarate pimpinatenari. Kaarira piireekite nonkove nashityaari, aña eerokatataike nokovape-rotake nashityaami. ¿Aritatsima aparoni eenchaaniki impinakoventero ikovityiiri ashitariri? Tera, aña iri ashitaaniri pinakoventziri ireentsite.¹⁵ Irootake nomateri naaka, onkempivaitaiyaaro naakami pirintari. Aritake nomatakerero noshinetakentyaami onkantya pavisakoshirentanyaari. Iniroite netakotakami. ¿Opaitama kaari petakotantana naaka?¹⁶ Kempitaka tzimayetatsi eerokaite kantatsiri: “Kempitaka Pablo te inkovakoyetai akaite, ovana jiyotzi, ari ikenakairo jamatavivaitakai.”¹⁷ ¿Piñaajaantakema jamatavivaitakemi eejatzi ikaratzi notyaantayetakemiri?¹⁸ Notyaantakemiri Tito, eejatzi pashine iyeki. ¿Jamatavitake-mima Tito? ¿Tema noshiyashiretavakai-yani maaroiteni naaka, naakameethayetaimira eerokaite?¹⁹ ¿Piñaajaantakema eerokaite iro nokantavaitakari nokova-shitara notzikaaventaty? Tera ari onkantya, netakotaneete. Aña iri Cristo ñaavaitakaana, onkantya novetsikashireta-kaantyaamiri. Iriira Pava iyotatsi.²⁰ Okantzimovaitatyaa-na naaka añeyeronie ankantaneentavakaavaitya aririka nareeta-pakyaami. Okantzimovaitatyaa-na eejatzi noñaapaakemi pintzimaventava-

kaavaitya, pinkisavakaavaitya, pinkisa-neentavakaavaitya, eero paapatziyavakaavaitya, pinkishimatavakaavaitya, pinkanta-kaaperovaitya, pimaimanetavakaavaitya.²¹ Okantzimovaitatyaa-na nompashiven-takovaityaami Pavaki. Aamaashitya ari nonkantaneentakovaitapaakyaaami pantayetakerorika kaariperori, te povashaantero pantayetziro kamaaroyetasiri, pimayempitavaitzi, piñaathatashivai-tantapiinta eejatzi.

13 ¹Irootakera mavatatsine nonkivantemi. Arira namenakontapaakyaa-miro, ikantajaantitakeri:

Intzimerika aparoni iyakoventaari, ontzimatyeera intzime mava atziri, terika, apite ñaakotakerine okaratz ikenakaashitakari, aratitsira irovatasankitaayeeteri.

²Arira nonkantapaakeri novasankitayeri ikaratz antzitakarori kaariperori janta pisai-kinta, arira nonkempitzitapaakyaa-eejatzi pashinepayeeni antayetanairori iroñaaka. Tema aritake nokamantzitaka-miro napiitantakaroriranki nokivantzimi. Irojatzira nosankinatakotzimiri iroñaaka.

³Aamashitya pikantaiyatiini eerokaite: “Kaarira Cristo otyaanterine Pablo inkinkithatakaante, kempitaka Pablo kaarira iriiperojanori.” Paamaventyaara, irika Cristo, kaarira atziri saikimotantama-tsitsapaintatsineri, aña otzimimoperotata-tziri ishindsighta irirori, kantatsira iriñaakayetemiro tsikarika opaiyetari.⁴ Ari okantavetaka, kempivaivetaka te iraavyaa-vitanete irika ipaikakoyeetantakariri. Iro kantamaitacha añaakagairira Ishindsighta Pava. Arira nokempitzitakari eejatzi naaka, tera naavyaavaitanete, iro kantacha irijatzira Pava shintsitakagaanari, kantatsira noñaakaayetaimiro tsikarika opaiyetari.

⁵Eerora pikinkishiretakovaitashitana tera niriiperojanorite naaka, aña pinkinkishiretakovavakya. ¿Iriiperojanrima pikantaka eeroka pikempisantai?

¿Tema piyotaiyeni inampishiretantami Cristo? Aritake okantari, terika, aamashitya te piriiperojanote eeroka. ⁶Niyopero-tataitzira, aririka piñaavakena janta, eerora pikempitakaantavakena, te niriiperotzi naaka. ⁷Nokovakotziri Pava, ari onkantya eero noñaakotantapaaka-miro pikenakaashitane. Tera iro nokantantamirori iroka nonkovashivaita-paakyaa nonkempitakotapaakyari iriiperajanori. Aña nokovaperotataitatzí pantayetairo okaratzí tampatzikatatsiri. Irootake nokovakeri, onkantavetya otzikaavakenami, eero noñaakantamiro noshintsinka novasankitaapaakemi, iroora niyotakaan-taperotyaamiri naakatake iriiperajanori. ⁸Tera nonkovero naaka noñaakantashi-vaityaaro noshintsinka, iro ovatsipero aririka nonkovemi namatavitantemi. Intaanira nokovi noñaakantataitero onkantya iriyotakoyeetantyaarori kyaaryoori. ⁹Aritakera nontharomenta-kyaa aririka noñaakemi paavyaavaishiret-nai, onkantavetakya eekero inkempita-kaantaitatyeenami naaka kaari aavyaavaitaneri. Iroora noñaañaatakota-

piintakeri, onkantya piñaantyaarori eerokaite pothotyeero paavyaavaishirepe-rotanete. ¹⁰Irootakera notyaantantamirori osankinarentsi, tera nosaikimoyetatyeeemi eerokaite janta, ari onkantya eero notsimaavaitantapaakami apaata. Tema iri Avinkatharite ovakenari onkantya novetsikashiretakaantantyaari, tera irovena novaariperoshirevaitante.

Ovekaraantarori ovethataantsi

¹¹Iyekiite, jiroka ovekaraantarori nonkantemi: Pinkimoshiretaiyeni. Pothotyaayetairo paavyaashirevaiyetai. Pintharomentashireyetai. Paapatziyavaka-ayetaiya. Kameetha pisaikeyetai. Ilriira Pava nampishireyetantyaamine, etakotantaneri jinatzi, iri kameetha saikakaantatsiri!

¹²Etakora pinkantya povethatavakaanaiya janta. ¹³Jovethatzitami eejatzi itasorentsi-takaitairi nampitarori jaka. ¹⁴iOnkaminthia-neshinonkavaitaimi Avinkatharite Jesucristo! iOnkaminthia iretakovaitai-yaami Pava! iOnkaminthia inkantakaiyaaro Tasorentsinkantsi paapatziyavakaantai-yaari! Ari onkantyaari.